

菩萨生地经 1 卷

No. 533

菩萨生地经

吴月氏优婆塞支谦译

闻如是：

一时佛游于迦维罗卫国释氏精庐，尼拘类树下坐，与五百比丘众俱。

是时，城中有释种长者子，名差摩竭，行诣佛所，稽首毕，一面坐，叉手白佛言：「菩萨何行，疾得无上正真之道，普具三十二相，从一佛国到一佛国，临寿终时其心不乱，所生不堕八难之处，常知去来之事，悉成诸法周满达事，知一切法无所罣碍，信解空行，得不起法忍，恒以至心欲作沙门，未曾犯戒，不乐居处？」

佛言：「大哉！差摩竭！乃问菩萨之行，忍辱为本，以立忍力乃疾得佛。忍有四事，何等为四？一曰、若骂詈者默而不报；二曰、若挝捶者受而不抗；三曰、若瞋恚者慈心向之；四曰、若轻毁者不念其恶。」

佛时颂曰：

「挝骂不以恚，	轻毁亦不恨，
菩萨忍如是，	所问悉可得；
慎言不欺慢，	未曾起乱意，
不犯不有恶，	是行得佛疾；
开士常以忍，	敦诚行大慈，
是用得成佛，	三十二相明；
从事于恶者，	常憊加捶杖，
害心施于人，	是不离恶道；

邪见自贡高， 急慙好瞋恚，
彼为自投冥， 终不近菩萨；
愚以贪强梁， 自用无礼敬，
不知孝父母， 是以有狱苦；
夫欲疾得佛， 常修戒德本，
依受善师教， 等心施于人。

「又有四事行疾得佛。何等为四？一曰、爱乐明经，好菩萨道，尽心护法，教诲于人；二曰、远离女人，不与从事；三曰、常好布施，沙门梵志；四曰、以不睡卧，心习空行。」

佛时颂曰：

「若以乐沙门， 常勤护经道，
爱法不远师， 如是人难得；
深学求佛意， 多闻广开人，
好施无慳心， 是行得佛疾；
女人不可亲， 败德乱世间，
从事于欲者， 未曾近菩萨；
是以清高士， 常防远女色，
净修菩萨道， 大悲济天下。」

于是差摩竭，即解身珠宝瓔珞用散佛上，佛之威神，令其所散止于虚空，化成宝盖，中有五百化人出，亦解身珠宝以散佛上，俱发声言：「愿发无上正真道意。」

差摩竭见诸化人，踊跃欢喜，问佛言：「此化所出，从天来耶？四方四隅地中出耶？」

佛报言：「是化不从十方来，亦非天，亦非龙，亦非神，亦非人，亦非地、水、火、风、空，非色、痛、想、行、识，亦非意、非心、非作、非往、非来，亦非今世，亦非后世，亦非生死；是人名化，字无从生，号为空，如影现于镜中，无执、无舍、无由来、无所得，无我、无人、无命、无识；若男子女子，见知诸法如化无识，闻此好信而行应者，是即佛子，为已去冥、兴世间明，为能降魔成极大德，是为沙门梵志，为清净菩萨大人，为无从生，已得授决，为不退转无上之人，信乐此法为如是也。」

佛告差摩竭：「若闻此经，而心惊怪、诽谤、形笑，当知是辈非沙门梵志，是为外道放逸之人，为无反复恶师之人，为暗蔽无眼诈称菩萨，是为诬罔抵突之人也。」

于是弊魔来问佛言：「信此法者能有几人？」

佛报魔言：「有四百亿欲天及人，皆得无所从生法乐，于中立是。」

时，差摩竭得不起法忍，五百比丘及五百清信士、二十五清信女，皆得立不退转地，寿终悉当生于西方无量寿佛清净国，常护持无数佛法，教化成就一切人民，使不退转，如是无极恒沙边劫，当于此土以次作佛。

魔闻佛言，稍稍却行，而谓佛言：「后可不须复说此法也！」

贤者阿难白佛言：「当何名此经？以何奉持之？」

佛语阿难：「是经名为“菩萨生地经差摩竭所问”，当奉持之。百劫行五度无极，而无大智无菩萨者，不如讽诵此经义以分布为人说。」

佛时颂曰：

「若信学生地经，其功德无有量，
斯已度三恶道，后受者福皆然。」

佛说此已，差摩竭及四辈弟子、诸天龙神，皆欢喜受持。

菩萨生地经

【经文信息】大正藏第 14 册 No. 0533 菩萨生地经

【版本记录】CBETA 电子佛典 Rev. 1.10 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，清凉月提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
